

Darnach wir also auff das aller kürhest haben von Natur vnd eygenschafft der Wölffe/ auch weiß vnd manier / die junge Spür vnd andere Jaghunde abzurichten/ beschriben / Stehts nachmals nun an dem / das wir anzeigen / wie vnd welcher weise man die Wölffe jagen / vnd auff allerley Manier fahen solle. Vnd dann vorn ersten zusagen / man soll allwegen den Abend darvor / wann man jagen will / sehen vnd fleiß ankehren / damit man jrgends eyn tod Pferd möge vberkommen / oder wo es des Herren / welcher das Gejagt anstellen will / gelegenheyt möchte sein / so solte man eyn sonder Pferd töden / vnd dasselbige zwen oder drei Armbrustschüze weit vom Gehölze / jrgends inn eyn gebauen vnd geegetes oder aber Sandecht Feld / wann Sandecht Land vorhanden ist / führen lassen. Das Eingewend aber soll man mit guten starcken Seylen vom Bast gemacht (dann keyn ander Seyl soll nicht dazu köffen) binden / vnd also dasselbige eynem Mann zu Ross noch denselbigen Abend / rings vñ das buschet / wo dasselbige nicht zu weit / noch allzu lang ist / vñschleppen / oder aber auff das wenigste alleyn an dem Bord vñführen / vnd also leztlich bei dem toden Pferde nachmals ligen lassen. Darnach soll der Man auff dem Ross eyn gut theyl wegs davon reiten / vnd bis inn die halbe Nacht oder etwas später im Felde bleiben / vnd hin vnd her auff dem Pferde vñreiten / damit also die Wölff nicht so bald das tode Pferd fressen / sonderlich wann sie gleich des Abends wolten anfangen darvon zuffressen / oder wann die Nächte allzu sehr lang sein / wie es dann im Winter pflegt zugeschehen / dann also möchten sie zu bald mit solchem Aß fertig werden / vnd darnach darvon lauffen. Wann sie aber erst gegen dem Morgen ansahen daran zuffressen / so bleiben sie im nächsten Gehölze oder Buschet ligen / vnd fliegen gar nicht davon. Im fall aber mehr dann eyn Buschet vorhanden / so muß man auch mehr dann vñ eyn eynziges Gebüsch das eingewend vñführen / vnd gar keyn ander Seyl / dann wie angezeygt / dazu gebrauchen / sonst werden die Wölff gar nicht zum Aß köffen.

Die person aber / so solches Eingewend vñführen soll / muß keyn solcher Man sein / welcher one das mit dem Windspiel / oder sonst anderen Jaghunden pflegt vñzugehen. Zu dem so soll er auch jrgends eyn kleyne linderliches Hündlin mit sich führen / vnd dasselbig an dem toden Pferd vnter des fressen lassen: dann also werden die Wölff vil künner dazu zutretten / vnd davon zuffressen. Es were auch nicht allzu böß / wann das tode Fleisch möchte nicht allzu weit von eynem stießenden wasser oder Bächlin / oder eynm murechten ort ligen / damit die Wölffe auch darauß trincken können / vnd also bei vnd inn dem nächsten Gehölze bleiben / vnd nicht weit / wann sie durstig sein / davon lauffen dörfen. Der Man aber / der das Ross vñgebracht / oder das tode Pferd geführt hat / solle die ander vier viertheyl von dem Aß reiffen / vnd jrgends an den nächsten Baum hengen / darnach die folgende nacht / dieselbigen eyn oder zwo stund vorn tag herunter werffen vñ fallen lassen.

Desselbigen gleichen möchte man eyn sonder person / wann es die gelegenheyt leidet / vnd der Mond des Nachts scheint / oder sonst nicht allzu finster ist / lassen auff eynen nächsten Baume darbei steigen / welcher die Wölffe sehe fressen / vnd nachmals anzeigen könne / wie vil derselbigen bei eynander gewesen / oder wo vnd welchen Wege sie gelauffen sein / vnd sich verborgen haben / nach dem sie sich von dem Aß satt genug befressen hetten. Dann es ist eyn groß glück / so die Alten Wölffe die erste Nacht kommen davon zuffressen: dann die jungen thuns sehr leichtlich: so bald aber die alten Wölffe kommen / so lauffen die jungen gleich davon / vnd lassen die alten jres gefallens davon fressen. Ich aber solcher alt Wolff auch davon frist / so laufft er zuvor rings herum / sihet vnd mercket fleißig auff / ob jemand vorhanden sei / der in beschädigen möchte: wann er nun will anfangen davon zuffressen / so laufft er eyns mals zu / vnd zerret drei oder vier gute stück davon / vnd weicht darnach widerum zu ruck: solches thut er also zum offtermal. Hab auch mein grosse lust gehabt / wann ich sie also hab forchtam fressend gesehen. Eynes auß meinem Gesindlin hat auff eyne weil im Jenner bei sechzehen Wölffe inn eynen Nacht gesehen an eynem Aß fressen.

Man

Wie man die Wölff äzen soll / das sie inn eyn gewissen Busch bleiben. Das Einges wird vñ schleppen.

Aß an die bäum auff hengen.

Wächter der Wölff auff den bäumen.